

LA QUOTIDIANA

FMR Fundaziun Medias Rumantschas, Via da Masans 2, 7000 Cuirà, 081 544 89 11, redacziun@fmr.ch



500 plazz d'alloschi stattan a disposiziun
En paucs dis infurmescha il chantun Grischun davart ses concept per fugitivs da l'Ucraina. **Pagina 2**



Dà ricover a fugitivs
Nina e Michael Bernhardsgrütter da Luven han ospità durant quatter mais ina famiglia da fugitivs e faschessan anc ina giada il medem. **Pagina 5**

FMR FUNDAZIUN MEDIAS RUMANTSCHAS
 südostschweiz

SURSELVA

«Negin banduna bugen la patria»

En Surselva dat ei probablamein negin'atra lingua da telefon aschi frequentada cull'Ucraina sco quella da *Simon Camartin* da Mustér. Mintga di ha el contact cun persunas pertuccadas dall'uiara; cun Ucrains ch'ei sin la fugia: «Negin banduna bugen la patria. Emigrar ei cumbinau cun malsegirtads ed in avegnir incert.» Prestar agid en fuorma da rauba e daners seigi ina puseivladad, dar il sustegn moral l'atra. Ils contacts da Simon Camartin han gia purtau fret: «Jeu hai gia saviu intermediar ina habitaziun ad ina dunna cun siu fegl che vegnan quels dis en Svizra.» Pliras persunas che vulan metter a disposiziun stanzas ni habitaziuns seigien s'annunziadas tier el: «Jeu supponel che nus duvrien quei plaz las proximas jamnas.» L'Ucraina haveva fatg in bien progress economic e social ils davos onns, surtur el vest eran las cundiziuns da viver semegliuradas. Auter era quei il cass egl ost dalla tiara. (fmr/hh) **Pagina 3**

SURSELVA

Tschun tonnas solidaritad

Avon in'jamna ha *Mathilda Derungs* instradau ina rimnada da rauba per l'Ucraina. Ella haveva udiu e legiu ils emprems rapports dalla situaziun ella tiara che l'armada russa ha attaccau la tiara. Gl'emprem appell ha gia evocau ina unda da solidaritad. La Viafier retica ha mess a disposiziun la remisa alla staziun da Glion per la rauba rimnada. Rodund 20 persunas ein segidadas culla logistica. Rodund tschun tonnas material e vivonda han quellas voluntarias e quels voluntaris pachetau en scatas conform allas normas. Gl'impresari da transports *Manuel Montalta* sustegn *Mathilda Derungs* cun in survetsch special. Damaun parta el culla rauba rimnada direct en direzziun Berna. El deposit central dall'ambassada ucraina vegnan las tschun tonnas dalla Surselva buca magazinadas, mobein semtgadas per in transport coordinau en direzziun Ucraina. Il convoi che l'ambassada ha organisau, duess arrivarr sonda proxima sil cunfin polac-ucrain. (fmr/abc) **Pagina 3**

ENGIADINA

Il success caritativ cun ün sdratsch

Cun ün'acziun spontana, missa in pè l'eivna passada durant üna sezzüda da team, ramassan las collavuraturas da la Tessanda St. Maria Val Müstair raps a favur da l'Ucraina. Ellas tessan ün sdratsch cul nom «Solidaritè». Quel daja da cumprar per 45 francs ed in duos variantas, in blau e gelg, dimena illas culuors da l'Ucraina. Las collavuraturas da la Tessanda prodüan quists sdratschs in lavur voluntaria e'l rechav vain surdat cumplettamaing a la Chadaina da Furtüna. Intant sun fingià gnüts postats passa 500 sdratschs – ün success caritativ i'l import total da 20000 francs. (fmr/cam) **Pagina 7**

GRISCHUN CENTRAL

La rauba da Salouf va en l'Ucraina

Er a Salouf vegn rimnà rauba d'agid. Quell'acziun vegn organisada da *Stephan Weyrich*, l'ustier dal hotel Alpina. Sper lampas èn er artitgels d'igienu u apotecas dumandadas. Da Salouf è la rauba vegnida transportada a Cuirà. Là surprena l'uniun «Ukrainehilfe Graubünden» la batgetta e trametta la rauba pachetada en pacs nudads cun il cuntegn a Berna. L'ambassada da l'Ucraina surprena allura il transport e la logistica fin al cunfin tranter la Pologna e l'Ucraina u fin ell'Ucraina. (fmr/rtr/lpd) **Pagina 8**

Colurs enstagl da pleds

«JEU VI VESER MEZZA NUA CH'IL MATERIAL VEGN A BERNA E CO IL CONVOI PER L'UCRAINA VEGN SEMTGAUS.»
 Mathilda Derungs

«NUS, LAS COLLAVURATURAS DA LA TESSANDA, ESCHAN CONSTERNADAS E NU PUDAIN BE GUARDAR PRO A QUISTA DOLUR, SAINZA FAR SVESS ALCH.»
 La squadra da la Tessanda Sta.Maria

«SCH'INS HOSPITESCHA FUGITIVS STON INS ESSER PERTSCHARTS CH'ILS BIARS EIN TRAUMATISAI E SURDUMANDAI.»
 Nina Bernhardsgrütter

«EMIGRAR EI CUMBINAU CUN MALSEGIRTADS ED IN AVEGNIR INCERT. IGL EI BUCA MO IL VIADI NAVEN DIL DACASA, MOBEIN ERA QUEL ATRAS PLIRAS TIARAS.»
 Simon Camartin

«NEGIN CARSTGAUN SA ELEGER EN TGEI MUND, RELIGIUN, CULTURA ED EN TGEI TIARA CH'EL NESCHA.»
 Sandra Palaia-Moor

I mancan ils pleds per descriver quai che capita actualmain en l'Europa da l'Ost – la guerra en l'Ucraina. Era Grischunas e Grischuns èn preoccupads e fan quitads. La solidaritad cun las victimas ed ils fugitivs è gronda. Oz è il di da rimnada naziunal da la Chadaina da Fortuna (tranter auter era tar RTR). Ed en quel connex rapporta la FMR oz dad acziuns da solidaritad en il Grischun, er ora en las regiuns rumantschas – da la vendita dad ovras artisticas enfin tar sdratschs da lavar giu. Po esser ch'i mancan ils pleds. Damai èsi da mussar colur. (fmr)